

## Uvodni govor UNICEF

### Konferencija o suzbijanju nasilja nad ženama i djecom u Sarajevu

UNICEF i Medica Zenica već više od pet godina zajedno rade na suzbijanju nasilja nad ženama i djecom u Bosni i Hercegovini. Od 2001. godine UNICEF je pomagao različite aspekte rada Medice, a posebno je bio uključen u obuku zajednice o unapređenju multidisciplinarnog odgovora na nasilje nad ženama i djecom.

U Medici je UNICEF prepoznao partnera koji je ponudio inovativni i profesionalan pristup poslu i koji odlikava i UNICEF-ovu poziciju. Kao organizacija odavno smo prepoznali potrebu za profesionalcima u raznim disciplinama – u jačanju prava, zdravstvu, zakonodavstvu, nevladinom sektoru. Uzajedničkom radu na nivou zajednice želimo osigurati da žrtve nasilja dobiju sveobuhvatan paket usluga kreiranih tako da olakšaju njihov oporavak i reintegraciju u lokalnu zajednicu. Takođe želimo zajedno uraditi što je moguće više da bismo spriječili i prepoznali nasilje u porodici u njegovom najranijem stadiju. Medica je vrlo rano prepoznala ovu potrebu. Koristeći iskustvo i znanje koje imaju, oni su osmislili trening i razvojni program koji se uspješno implementira u brojnim mjestima širom zemlje, unapređujući kapacitete stotina profesionalaca u njihovom koordiniranom odgovoru na potrebe žena i djece.

Možda je još važnije spomenuti da Medica neumorno, kroz istraživanja, publikacije i mobiliziranje javnosti, radi na tome da se pitanja nasilja nad ženama i djecom nađu na dnevnom redu političkih subjekata. Današnja konferencija i njoj slični događaji su od vitalnog značaja jer održavaju pažnju javnosti na pitanjima nasilja nad ženama i djecom.

Podrazumijeva se da je UNICEF s ponosom aktivno podržavao rad Medice preko pet godina i da će nastaviti s podrškom jer su njihovi programi i aktivnosti vrlo kvalitetni i daju uspješne rezultate. Najbolji dokaz značaja i efektivnost Medicinog rada leži u izjavama i znanju profesionalaca koji su se danas okupili ovdje. Sigurna sam da će njihovo iskustvo i perspektive doprinijeti da Konferencija donese vrijedne preporuke i planove, te da će svi moći sagledati kako je Medicin rad u mnogim

zajednicama u ovoj zemlji promijenio način na koji se odgovara na potrebe žena i djece žrtava nasilja u porodici.